



Veterans ch'èn vegnids undrads a Savognin per lur commembranza da 60 e 50 onns tar ina furmaziun da musica. FOTOS G. N. STGIER



Il dirigent Adrian Farrer e Flavio Sterli (da san.), il president da la Musica instrumentala Savognin servan als novs veterans d'onur in magiel vin per il giubileum.

Nagina musica da veterans grischuna

Uniun dals veterans da musica dal Grischun

DA GION NUTEGN STGIER / ANR

■ **Josef Schaniel ha manà en moda suverana la 40avla radunanza sco president da l'uniun. Da nov en la suprastanza è vegnida elegida Evelina Lehner. Cun Robert Casanova e Toni Tgetgel èn duas corifeas da la musica instrumentala da nov veterans d'onur.** La vischnanca da Savognin ha purschì tetg a passa 400 veterans da musica da noss chantun e suenter la dieta èn tuts turnads da Surses a chasa cun bunas impressiuns. Ils musicants e las musicantas da la Musica instrumentala Savognin èn stads ospitants gentils ed han purschì als numerus giasts in program cun musica da vaglia e plets empernaivels. *Flavio Sterli*, il president da la societad da musica, è sa mussà ventiraivel da pudair beneventar gia per la terza giada dapi il 1992 e 2011 ina uschè gronda raspada en la sala polivalenta. Drizzà intgins plets cordials a veteranas e veterans ha lura er *Patric Vincenz*, il president communal da Savognin. La populaziun e las autoritads politicas sajan loschas da beneventar veteranas e veterans da musica. *Josef Schaniel*, il Surmiran sesent a Cuir, è dapi dus onns president da l'uniun che reunescha veteranas e veterans da musica da noss chantun. El ha manà speditivamain e cun intgin umor la dieta da giubileum. Tar quella èn ils tractandums statutars plitost stads secundars, persunter è la cumpagnia stada en il center. L'uniun haja da preschent stgars 1300 commembers e

commembras, ha ditg Josef Schaniel. Plaschair ha il president er gi da las set delegaziuns da veterans dals chantuns amis. Lur preschientscha numerusa conferma la relaziun empernaivla tranter veteranas e veterans da musica er ordaifer il Grischun, ha accentuà il president.

I resta tar duas musicas da veterans regiunalas

In giavisch da l'Uniun chantunala da musica dal Grischun, dentant er da la federaziun svizra sco er da l'uniun che ha gi sia dieta a Savognin fiss stà da fundar ina musica da veterans en il Grischun. L'uniun ha lura fatg ina retschertga en ils quatter districts da musica da noss chantun per examinar sche l'interess per fundar ina musica da veterans è avant maun. Il resun è stà tut auter che positiv cun be paucs veterans avair interess da far part da quella musica. Uschia renunzia l'uniun per il mument da fundar ina musica da veterans. Fin ussa han il Grischun central ed il Partenz ina musica da veterans activa. En Svizra exista quella furmaziun schizunt en 16 chantuns.

Danovamain ina dunna en suprastanza

Fundada è l'Uniun dals veterans da musica dal Grischun vegnida il 1976 e quai sin iniziativa d'Oscar Tschuor, il cumpnista da Rueun, ch'è mort il 1987. En in onn tar la dieta a Termin/Trimmis vegn festivà il giubileum da 40 onns da l'uniun. Demissiuinà sco commember da la

suprastanza e quai suenter otg onns aveva *Ernst Ledermann* da Samedan. Sia lavur a favur da l'uniun è vegnida remunerada cun nominar ils preschents il suprastant partent sco commember d'onur da l'uniun. Per el han veteranas e veterans elegì en suprastanza *Evelina Lehner* da Fran. Suenter *Erna Komminoth* è l'Engiadinaisa la segunda dunna che fa part da quel gremium.

12 novs veterans d'onur

En in mument da silenzi han lura ils preschents prendì per adina cumià da lur 30 amis da musica ch'èn morts dapi la dieta dal 2014 a Trun. Il pli vegl veteran aveva 97 onns ed il pli giuvan 62 onns. In mument pli plaschaivel è lura stà quel nua che l'uniun ha undrà veteranas e veterans. Tranter quels 13 ch'èn 50 onns activs sa chattan er intgins da societads da musica da l'intschess rumantsch. Undrà per esser 60 onns musicant activ è vegnì *Engelhard Menig* da Susch. Da nov commembers d'onur da l'Uniun dals veterans da musica dal Grischun èn dapi dumengia passada er *Robert Casanova* da Vignogn e *Toni Tgetgel* da Zezras, omdadus personalitads en la scena da la musica instrumentala. Robert Casanova è stà in promotur da la generaziun giuvna, president chantunale e districtuale ed in um che ha vivi per sia passiuin, la musica. Quai vala er per Toni Tgetgel, el che ha dirigì decennis fin tschintg societads da musica ed intginas furmaziuns da musica da militar ed expert tar numerusas festas da musica.



In magiel vin er d'Anita Netzer per il veteran Heiri Hochholdinger.



Domenic Janett (san.), in musicant da vaglia, cun Men Caviezel.



Viva sin ils veterans Marcel Beer e Toni Cathomen (da san.).



Ernst Ledermann cun sia successura per la suprastanza Evelina Lehner.



Han er giudi di da Savognin: Ottilia Beer e Venanzi Albin.